

# Txirritola

ARAMAIO / Barikua / 2002ko irailaren 20a / 38. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com

## Dagoeneko guztia gertu dago aurtengo Txirritola Eguna ospatzeko

UBANE MADERA

Azken urteotan ohitura bihurtu denari segituz, gaur zortzi Txirritola Eguna ospatzeko ekitaldiak hasiko dira Aramaion. Pailazoak, herri bazkaria eta Amaia Zubiria abeslaria izango dira, besteak beste. Herri bazkarirako txartelak aurretik erosi behar dira.

Hiru urte beteko ditu martxoan Txirritola Euskara Elkartek. Eta, urte horietakoarekin jarraituz, aurten ere Txirritola Eguna antolatu dute irailaren azkeneko astebururako.

Barikuan eta zapatuan izango dira ospakizun ekitaldiak. Umeendako saioarekin hasiko dira. Horrela, barikuan bertan, Takolo Pirritx eta Porrotx pailazoak arituko dira, kultura etxean, arratsaldeko sei eta erdietan. Sarrerak bost euro balio du, hiru euro liburutegian aurretik erositzen gero.

### HERRI BAZKARIA

Baina jaien egun handia zapatuan izango da. 13:00etan, trikitixak lagundutako txikiteoa izango da; eta barruak ondo berotu eta gero,



Amaia Zubiria abeslariak kantu zahar eta berriak kantatuko ditu datorren zapatu gauean.

herri bazkaria, 14:30ean. Bazkaria joateko irailaren 25a baino lehen erosi beharko dira txartelak. Herriko tabernetan daude salgai. Nagusiek hamar euro

ordaindu beharko dituzte eta umeek, berriz, sei. Bazkalostean, Gillermo Segurola txistekontalaria arituko da bazterrak pozten bere txistekin.

Eta, bukatzeko, gauean, luxuzko abeslaria entzuteko aukera izango da: Amaia Zubiria. Hark kantu zahar eta berriak abestuko ditu Aramaion.

*Barikua arratsaldean, Takolo Pirritx eta Porrotx pailazoak izango dira kultura etxean*

*Herri bazkarirako menu goxoa prestatu dute: paella, erredondoa eta tarta izozkiarekin*

*Eguna biribiltzeko, Amaia Zubiria abeslariak kontzertua eskainiko du*

### HERRITARREN HITZA / Manex Agirre • Ikaslea

## Distantzien gainean berbetan

Irail berria, udazken berria, Aramaion taberna "berria" baina berri berririk ez: zaharrek berri paraje hauetan ere, badirudi gure notiziarioa agurtu eta kaletik paseatzen duen aitate bihurtu dela. Hala ere, hemen natorkizue berriro idatzizko jardunak, ematen duen distantzia honetatik. Eta abisatzen dut: gaur "distantziak" jardungo dut.

Distantzia baita mundu erdi-berde honetan daukagun kontzepturik erlatiboena, eta erlatibotasun hori frogatzeko zerrenda bat izan nahi nuke gaurko ataltxo honek. Distantziak ez baitu berdin balio begiratua den batentzat, edo

begiratzen dionarentzat, begiratzen duena beti sentituko baita urrunegi, eta begiratua hurbilegi. Edo barruan deabru txikiren bat daramanarentzat beti izango da distantzia txikiegia, Antartikara badoa ere hurbilegi edukiko baitu deabru hori bihotzetik, Antartikan bihotza ere izoztu egin daitekeela sinistuko duen arren. Edota batzuentzat demokrazia beti dago urrun, edo urrunegi, eta besteentzat (denok



**"0-lekua izan daiteke bakoitza bizi den etxea"**

mendi punta bat, hondartzan hondoratutako makina bat edo putetxe bat. Baina erreferentzia bat da beti. Bertatik esango

dakigu zeinetaz ari naizen) hurbilegi, bai, hurbilegi.

Guztia da bakoitzaren 0-lekua (eta ez naiz estatubatuarrek mundu osoari saldu dioten orube horri buruz ari) non kokatzen den. Bertatik egongo gara hurbil, edo urrun. Eta 0-lekua izan daiteke bakoitza bizi den etxea,

dugu urrun edo hurbil gauden.

Baina ez hurbil edo urrun munduan momentu honetan daukagun kokagunearen arabera, gure hurbil edo urrun egotearen kontzeptioaren arabera baizik. Ni egon bainaitetxe putetxe batetik hurbil, eta inpotentea izan (hurbil eta urrun aldi berean egotea deitzen diot nik horri). Eta punto.

Nik ez dakit zenbat distantzia dagoen Aramaioetik Emaldipera, baina ez naiz bertatik hurbilegi edo urrunegi egongo asteburu honetan, hori izango baita nire 0-lekua 21 eta 22an. Bon Voyage!

### LABUR

## Udalbatzarrak ohiko bilkura egin zuten eguaztenean

Hamar gai zituen udalbatzarrak aztertzeko iraileko bilkuran. Tartean, babes ofizialeko etxebizitzekin lotuta, xehetasunezko estudioa onartzea proposatu zieten zinegotzietan. Horrez gain, Arexolako lanak egiteko aurkeztu diren enpresen proposamenak ere aztertzeko zituzten. Eta, bukatzeko, kultura etxearen kudeaketa kontratua luzatu edo ez erabaki behar zuten. Edozelaan ere, hau idaztean batzarra egin barik zegoenez, ez dakigu zertan geratu diren.

**TELEFONO JAKINGARRIAK**

**OSASUNA / LARRIALDIAK**

|                                 |              |
|---------------------------------|--------------|
| Osasun etxea (txandak) .....    | 945 44 53 40 |
| Botika .....                    | 945 44 50 03 |
| Udaletxea .....                 | 945 44 50 16 |
| Ertzaintza (Arrasate) .....     | 943 79 71 99 |
| Gurutze Gorria (Legutio) .....  | 945 45 52 52 |
| San Martin Eskola .....         | 945 44 50 04 |
| Taxia eta autobusak .....       | 945 44 50 33 |
| Udal kiroldegia .....           | 945 44 53 35 |
| Postetxea .....                 | 945 44 50 83 |
| Zuako Eskualdea .....           | 945 43 01 67 |
| Suhiltzaileak (Zubillaga) ..... | 943 78 28 00 |

**AUTOBUSORDUTEGIA**

| ARRASATE | ARAMAIO | GASTEIZ |
|----------|---------|---------|
| 07:00    | 07:15   | 08:00   |
| 10:00    | 10:15   |         |
| 11:00    | 11:15   |         |
| 12:00    | 12:15*  | 13:00   |
| 15:15    | 15:30   | 16:15   |
| 17:20    | 17:35   |         |
| 18:30    | 18:45   |         |
| 20:05    | 20:20*  | 21:05   |
| 21:00    | 21:15   |         |

| GASTEIZ | ARAMAIO | ARRASATE |
|---------|---------|----------|
| 08:15   | 09:00   | 09:15    |
|         | 10:15*  | 10:30    |
|         | 11:15   | 11:30    |
| 13:10   | 13:55   | 14:10    |
| 16:20   | 17:05   | 17:20    |
|         | 17:35   | 17:50    |
|         | 18:45*  | 19:00    |
| 19:00   | 19:45   | 20:00    |

**OHARRAK**

**ARAMAIOKO GAZTE ABESBATZA**


Aramaioko hainbat neska-mutilengan gazte abesbatza osatzeko gogoia sortu denez, dei egiten diete gazteei, ekimen horretan parte hartzea gura izanez gero, ager daitezela gaur, bari-kua, 19:00etatik 20:00etara kultura etxean izango den batzarrera. Batzar horretan egitasmo hori aurrera eramateko aukera eta laguntzak aztertuko dituzte. Anima zaitzete, bada, zenbat eta gehiago, hobe izaten da-eta! Zalantzaren bat izanez gero, 20:00etatik aurrera telefono hauetara dei egin dezakezu: 945 44 51 75 edo 945 44 52 47.

**JANTOKIRAKO JENDE BILA**

San Martin Eskolako jantokia erabiltzen duten umeak zaintzeko langileak behar dira. Ezinbestekoa da euskaraz berba egitea. Interesatuok, deitu 945 24 80 62 edo 945 24 95 62 telefonotara.


**ERRETIRATUEN EGUNA**

Aramaioko Udala arduratu-ko da oraingo urteko Erretiratuen Eguna antolatzaz. Kontua da makina bat urtean San Martin Sendi Elkartea arduratu dela lan horrekin, baina dagoeneko elkartea bertan behera geratu denez, Udalaren ardurapean geratu da egun hori antolatzaz. Edozelan ere, orain arte bezala, urriko azkene-ko zapatuan egingo dute herriko nagusiendako jaiak.



**Xabierren agurra**

Azken hiru urteotan Aramaion abade eginkizunetan ibili den Xabier Madrilera joango zaigu, Teologia ikastera. Urte haue-tan guztietan meza ugari esan ditu Aramaioko auzoetan, eta, joan aurretik, auzotarrek hainbat oroigarri eman dizkiote. Argazkikoak Uribarri auzokoak dira eta eman zioten argaz-kia du eskuetan Xabierrek. /ROSA MONDRAGÓN



**Behia opari, "mutilzahar" berriari**

Asier Arrizabalagaren koadrilak ezuste ederra prestatu zion 30 urte bete berri dituen mutil horri. Aramaion ohitura den bezala, 30 urte bete eta andregairik ez daukana *mutilzahar* iza-tera pasatzen da. Aitzakia horrekin, lagun arteko afaria izan zuten joan den zapatuan, eta Asierrek sekula ez ahazteko modu-ko oparia jaso zuen: argazkiko behi dotore hori! Zorionak!. /R.M

**BOTEPRONTOAN/ Jabier Arriaran · Oiligor ehiza eta arrantza taldeko presidentea**

*"Fama handiegia daukagu hemen, Aramaion, eta ez da horrenbesterako"*

**E** hizak zale ugari batzen ditu Aramaion. Horren adibide da Oiligor elkarteak batzen dituen bazkide mordoak. Horren gainean jardun dugu Jabier Arriaranekin (Xabi, lagunendako), Oiligor elkartearen presidentearekin. Besteak beste, kontatu digu Oiligorrek Aramaioko ehiza-barrutia kudeatzen duela:

**Zelan da hori?**

Gauza bat da elkartea eta beste bat ehiza-barrutia. Hemen barruan bazkide mordoak gaude (220 bat), baina guztiak ez dira Oiligorreko bazkide.

**Noiztik zaude taldean?**

Sei urte daroat, lau diruzain eta orain, urtebete daroat presidente. Beste bat, eta kito. Sei urte nahikoa dira. Ardura handia da, istripurik izanez gero, aurreneko arduraduna neu naiz. Bazkide izaten segituko dut.

**Taldea noiz sortu zen?**

Ehiza-barrutiak hamar urte daroat. Gipuzkoarekin eta Bizkairekin konparatuta, Araba desberdina da. Gipuzkoan eta Bizkaian dena librea da, edozein joan daiteke edozein lekutara; Araban ez. Taldea? Ez dakit ziur. Nik ikusita ditut 60ko hamarkadako paperak.

**Badakizu zergatik sortu zen?**

Elkartzeko modua-edo izango



*"Aramaioko talde handienetariko bat gara. Ehiza taldeekin konparatuta, asko gara"*

zelako, lagun artean ibiltzeko...  
**Asko zarete taldean...**

Bai, Aramaioko talde handienetariko bat gara. Eta, gainerako ehiza taldeekin konparatuta, asko gara; batez bestekoaren gainetik gaude.

**Ehiztariak eta arrantzaleak, biak kontatuta?**

Ez. Ehiza eta arrantza taldea gara, baina arrantza utzita dugu. Aurten, taldeari izena aldatuko diogu, ehiza talde izateko. Urtean umeendako arrantza lehiaketa bakarrik egiten dugu, besterik ez.

**Elkartean zer egiten duzue?**

Paperak, ehiza denboraldia preparamu eta postuak zozkatu. Zozketa ordenagailuz egiten dugu, urtean hilabete birako: urrirako eta abendurako. Hala, bakoitzak egunero-egunero postua dauka. Horrez gain, Oilagor Txapelketa antolatzen

dugu azaroko bigarren astean. Irabazlea Arabako Txapelketara joaten da; eta nahiz eta azken urteetan emaitza txarrak izan, Aramaiotik joan izan da jendea Euskal Herriko eta Espainiako txapelketetara.

**Zenbat postu daude Aramaion?**

143 bat. Tellamendin, San Adrianen, Kurtzeberri eta San Adrian bitartean, Kurtzetan, San Kristobalen eta Arangion zatitxo bat. Marixekan, Jarinko puntaraino eta handik Gipuzkoako mugaraino. Aurten, gainera, beste 15 urteotarako berriro dugu.

**Zeren postuak dira?**

Batzuk usoendako, beste batzuk birigarroendako; eta beste batzuk mistoak dira.

**Eta ehiza ona dago hemen?**

Fama handiegia daukagu hemen, eta ez da horrenbesterako. Uso-paseak lau egunean daude, eta oilagor eta basurde gutxi dago. Oilagor urte ona izanez gero bai, baina bestela... Birigarroei dagokienez, azken urteotan nahiko eskas gabilta. **Zer esango zenieke ehizaren kontrakoei?**

Usoen ehizaren kontra egotea absurdua dela, usoa seguru dago. Eta, adibidez, Europarekin konparatuta, hemen ehiza nahiko mugatuta dugu.

*"Usoen ehizaren kontra egotea absurdua da. Asko dago. Ehiza nahiko mugatuta dugu"*